

DOMENIE XXI «VIE PAL AN»

Jutoris pe Liturgjie

Domenie, ai 26 di Avost dal 2018

In tims lontanons cuant che lis tribùs dai ebreus si sistemarin te tiere di Canaan, (secul XII p.d.C.) il lôr leader Gjosuè al clamà il popul a Sichem e ur disè: “Se no us va di stâ sot dal Signôr, sielzêt daurman cui ch’o volês servî”. Il popul al rispuindè: “Nancje insumiâsi di butâ di bande il Signôr par stâ sot di altris dius!”.

Dopo il discors di chestis domeniis sul pan de vite, une vore di dissepui di Gjesù si tirarin indaûr e no levin plui cun lui. Alore Gjesù ur disè ai Dodis: “Volêso lâsint ancje vualtris?”. I rispuindè Simon Pieri: “Signôr, dome tu tu âs peraulis di vite eterne”.

E rivin al 2018, a chescj moments tant problematicis pe glesie catoliche e tant dificii, culî, pe nestre diocesi. Intant che lis glesiis si svueidin, nus ven ponude dal Signôr la stesse domande: “Volêso lâsint ancje vualtris?”. Se o rispuindìn: “Nancje insumiâsi di butâ di bande il Signôr” alore chest al compuarte di volê ben a lis nestris comunitâts come che Crist i à volût ben a la Glesie e si è ufiert par jê par fâle sante (cfr. seconde leture).

Ma dut chest, come ai tims di Gjosuè, come ai tims di Gjesù al compuarte: Se un al ûl vignî daûr di me, che al rinei se stes, che al cjapi su la sô crôs te comunitât e che al vegni daûr di me (cfr. Mt 16, 24).

Antifone di jentrade

cf. Sal 85,1-3

Slungje la tô orele, Signôr, e rispuindimi:
gno Diu, salve il to famei che in te al spere;
ve dûl di me, Signôr,
ch’o ai berlât viers di te dute la zornade.

Colete

Diu, che tu unissis tun sôl volê i cûrs dai tiei fedêi,
daur ai tiei popui di volê ben a ce che tu comandis
e di bramâ ce che tu desideris
par che, framieç dai savoltaments di chest mont,
i nestris cûrs a sedin pontâts là ch’e je la vere gionde.
Pal nestri Signôr Gjesù Crist to Fi, ch’al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Gs 24,1-2.15-17.18

O starin cul Signôr, parcè che al è lui il nestri Diu.

La mentalitât religjose dai cananeus e jere semplice, la morâl e il cult cence grandis esigjenciis. Lis tribùs di Israel a vevin une altre tempore religjose, ma si cjatavin ancje come cu la pome di Eve tal Eden: la femine e viodè che l’arbul al jere bon di mangjâ e biel di cjalâlû e che al jere, chest arbul, golôs cence fin par rivâ a cognossi dut. E òlmâ une pome e le mangjà (Gjen 3, 6). Cussì lis dodis tribùs a sbrissavin viers i idui di Canaan.

Vuê noaltris no sin lontans di cheste tentazion; va là che o podìn ancje confondisi cu lis tribùs dal secul XII p.d.C.

Par chest o vin propit dibisugne di scoltâ ce che nus dîs Gjosuè.

Dal libri di Gjosuè

In chei dîs, Gjosuè al clamà a Sichem dutis lis tribùs di Israel; po al clamà dongje ducj i anzians di Israel, i siei socestants, i siei judiçs e i siei scrituriscj, che si meterin presince di Diu. Alore Gjosuè i

disè a dut il popul: «Il Signôr, Diu di Israel, al dîs cussì: Par vieri i vuestris vons, come Terac, pari di Abram e di Nacor, a jerin a stâ di là dal flum e a levin daûr di altris dius. Se però no us va di stâ sot dal Signôr, sielzêt daurman cui ch'ò volês servî: se i dius ch'a levin daûr i vuestris vons di là dal flum o ben i dius dai amoreos ch'ò sês a stâ cumò te lôr tiere. Par chel che mi rivuarde me e la mê int, nô o starin cul Signôr!».

Il popul al rispuindè: «Nancje insumiâsi di butâ di bande il Signôr par stâ sot di altris dius! Il Signôr nestri Diu al è chel che nus à fats vignî sù, nô e i nestris vons, de tiere dal Egjit, de cjase ch'ò jerin sotans, ch'al à fat robonis sot dai nestris vôi e nus à parâts dilunc fûr te strade ch'ò vin fate e stâ framieç di dutis lis tribûs ch'ò vin passât jenfri. E il Signôr al à fat cori denant di nô ducj i popui e ancje i amoreos ch'a jerin a stâ culi. Ancje nô o starin cul Signôr, parcè che al è lui il nestri Diu!».

Peraule di Diu.

SALM RESPONSORIÂL

dal Salm 33

Il salmist al à fate la sô sielte e cumò le proclame cence pôre te samblee liturgjiche: La mê vite tal Signôr si glorie, che lu sepin i puars e s'indalegrin.

Il salm nus da plui di cualchi motif di riflission e ognun che al sielzi la perauale che i fâs dal ben, intant che il ritornel nus ricuarde:

R. Il Signôr al è dongje di chei che lu servissin.

Se cjantât: Il cjant dai salms responsoriâi, p. 158.

O vœi benedî il Signôr cence polse,
la sô laut simpri su la mê bocje.
La mê vite tal Signôr si glorie,
che lu sepin i puars e s'indalegrin. **R.**

I vôi dal Signôr a son dome pe int juste
e lis sôs orelis pai lôr berlis cuant che lu clamin.
Il Signôr al ten di voli chei ch'a fasin robatis,
par scancelâ ancje il lôr ricuart di cheste tiere. **R.**

I juscj a an berlât e il Signôr ju à sintûts
e ju à deliberâts di ogni berdei.
Se un al à il cûr displasint il Signôr i sta dongje,
se al à il cûr pintût lu salve. **R.**

Lis disgraciis dal just a son tantis,
ma il Signôr lu delibere di dutis.
Ducj i siei vœs lui ju vuarde,
in mût che nancje un no si crevi. **R.**

Il trist al è fat fûr de sô tristerie;
chei ch'a odein il just a an di purgâlis.
Il Signôr al salve la vite dai siei fameis;
chei che si parin li di lui no varan cjastic di sorte. **R.**

SECONDE LETURE

Ef 5,21-32

Chest misteri al è grant: lu dîs sul cont di Crist e de glesie.

Tignìn presint il moment storic che la letare e je stade scrite, la mentalitât dai timps, de Grecie e di Rome, la tradizion dai ebreus e la situazion personâl di Pauli e o rivarìn a valutâ cun bon sens chestis opinions su lis feminis. Pauli al è amî di Crist tune mentalitât dal dut gnove, ma al è ancje fî dal so timp tun mût di viodi che al tignive bot.

Noaltris o vin di capîlu cence pontâ il dêt, intant che o puartîn indevant i siei principis une vore valits ancje te nestre societât di famee licuide: stait sotponûts un a chel altri tal timôr di Crist... Oms, volêt ben a lis vuestris feminis come che Crist i à volût ben a la Glesie...

I timps a son mudâts ma la sostanza di fonde - che si voleis ben un cul altri come che jo us ài volût ben a vualtris (Zn 15, 12) - nissun le cancele e salde e reste.

Di une altre bande l'Apuestul ancje al scrîf: nol esist plui ni gjudeu ni grêc, nol esist plui ni sotan ni libar, nol esist plui ni om ni femine: ducj vualtris o sês une persone sole in Crist Gjesù (Ga 3, 28).

De letare di san Pauli apuestul ai Efesins

Fradis, stait sotponûts un a chel altri tal timôr di Crist.

Lis feminis ch'a sedin sotponudis ai lôr oms come al Signôr, parcè che l'om al è cjâf de femine, come che ancje il Crist al è cjâf de glesie, lui ch'al è il salvadôr dal so cuarp. E come che la Glesie e je sotponude a Crist, cussì ancje lis feminis a an di jessi sotponudis ai lôr oms in dut.

Oms, volêt ben a lis vuestris feminis come che Crist i à volût ben a la Glesie e si è ufiert par jê par fâle sante, smondeantele cu la purificazion da l'aghe compagnade de peraule, e par vê dongje di se cheste Glesie, sflandorose, cence magle o grispe o alc altri dal gjenar, ma sante e immacolade. Cussì ancje i oms a an di volêur ben a lis lôr feminis, come ai lôr cuarps. Chel che i vûl ben a la sô femine si vûl ben a se: di fat nissun nol à mai odeade la sô stesse cjar; che anzit le nudris e le trate cun cure, come ch'al fâs ancje Crist cu la sô Glesie, parcè che o sin parts dal so cuarp. Par chel l'om al bandonarà so pari e sô mari e si tirarà dongje de sô femine e i doi a deventaran une cjar sole. Chest misteri al è grant: lu dîs sul cont di Crist e de glesie.

Peraule di Diu.

CJANT AL VANZELI

Zn 6,63.68

R. Aleluia, aleluia.

Lis tôs peraulis, Signôr, a son spirt e vite.

Dome tu tu âs peraulis di vite eterne.

R. Aleluia.

VANZELI

Zn 6,60-69

Di cui varessino di lâ? Dome tu tu âs peraulis di vite eterne.

Il discors di chestis domenîs sul pan de vite vuê si conclût (Zn 6, 26-59) e il risultât al sa di faliment. Trop la int ae capît, trop fraintindût, trop sono restâts spaurîts, trops ano decidût di no volê capî... Il fat al è che i siei dissepui si tirarin indaûr e no levin plui cun lui.

Gjesù, o l'evangjelist par lui, ancje al spiegha: al è il Spirt... lis peraulis che us ai ditis... ma and è cualchidun... nissun nol pò vignî...

A nô nus somee stranie cheste conclusion, ma ce restial dal discors sul pan de vite, su la Eucaristie tes nestrîs glesiis di vuê? Chest discors, cjapât pardabon, al è dûr. Al jere dûr îr, al è dûr vuê.

Intant che o cjalìn a la nestre spirtualitât personâl e a lis comunitâts, e reste ancje par nô la conclusion umile ma colme di fiducie: «Signôr, di cui varessino di lâ? Dome tu tu âs peraulis di vite eterne e l'invît di Gjesù: Lavorait no pe mangjative che e va di mâl, ma pe mangjative che e dure pe vite eterne (Zn 6, 27).

Dal vanzeli seont Zuan

In chê volte, dopo di vê sintût cussì, une vore dai siei dissepui i diserin: «Chest discors al è dûr. Cui rivial a parâlu jù?». Gjesù, savint dentri di se che i siei dissepui a bruntulavin a rivuart di chest discors, ur disè: «Chest us scandalizial? E cuant che o viodarês il Fi dal om a lâ sù là ch'al jere prime? Al è il Spirt chel ch'al fâs vivi, la cjar no zove a nuie. Lis peraulis che us ai ditis a son spirt e a son vite. Ma and è cualchidun fra di vualtris che nol crôt». Di fat Gjesù al saveve ancjemò di biel

principi cui ch'a jerin chei che no crodevin e chel che lu varès tradît. E al diseve: «Par chest us ai dit: Nissun nol pò vignî di me se no i è dât dal Pari».

D'in chel moment une vore dai siei dissepui si tirarin indaûr e no levin plui cun lui. Alore Gjesù ur disè ai Dodis: «Volêso lâsint ancje vualtris?». I rispuindè Simon Pieri: «Signôr, di cui varessino di lâ? Dome tu tu âs peraulis di vite eterne, e nô o vin crodût e o vin ricognossût che tu tu sês il Sant di Diu».

Peraule dal Signôr.

Su lis ufiertis

Signôr, che cuntune sole vitime,
ufierte une volte sole,
tu ti sês cuistât un popul di fîs,
danus, inte tô Glesie, la gracie de unitât e de pâs.
Par Crist nestri Signôr.

Antifone a la comunion

cf. Sal 103,13-15

Cul prodot des tôs voris tu passis la tiere, Signôr,
par tirâ fûr il pan de tiere e il vin ch'al indalegri il cûr dal om.

O ben:

Zn 6,54

Chel ch'al mangje la mê cjar e al bêf il gno sanc
al à la vite eterne, al dîs il Signôr,
e jo lu resussitarai te ultime dì.

Daspò de comunion

La midisine dal to boncûr, Signôr,
ch'e operi adimplen dentri di nô
e judinus e refinissinus
in mût di fâti content in ogni nestre vore.
Par Crist nestri Signôr.

* * *

Riflession di pre Antoni Beline: Un fevelâ dûr

O sin simpri tal discors che Gjesù si presente sicu bocjade dal mont e mangjative de vite eterne. Lu à dit cussì clâr e risolût e cence nissun staronzament, che ducj a àn tacât a brundulâ, a invelegnâsi, a runtinâ. No podevin stâ a sintîlu parcè che al fevelave masse dûr. Ma però al jere un discors vêr e clâr. E cuant che un al fevele clâr e al dîs veretâts, si pò sustâsi, si pò restâ pal moment copâts...

Vanseli par un popul, an B, p. 148.

* * *

Cjants

Libri Hosanna, sot dal titul Eucaristie: messe, benedizion eucaristiche, rîts e cjants; dal n.7 al n.62 comprendût.

* * *

***Tu, Signôr che dut tu puedis, tu âs fate ogni robe a glorie dal to non;
tu âs dât a ducj, feminis e oms,
mangjative e bevande pal lôr sostentament e confuart
e lôr ti àn agrât;***

*ma par nô tu âs tignude di bande une mangjative e bevande spirtuâl
e la vite eterne midiant dal to servidôr Gjesù.*

Didachè, secul prin

* * *

Vuê, **Domenie ai 26 di Avost**, aes sîs sore sere te Plêf di Sant Pieri a Zui
44n ANIVERSARI DI FONDAZION DI GLESIE FURLANE
cu la partecipazion dai soliscj dal Coro “Rôsas di Mont” de Plêf di Guart.
Benvignût !

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La Nuova Base.*
- * *Par domandâ chescj libris scrivêt a info@glesiefurlane.org*